



Broj: 01,02,-05-1-1703/16
Sarajevo, 24.10.2016.

ZABILJEŠKA

sa sastanka Parlamentarne grupe prijateljstva Bundestaga za BiH s članovima Komisije za vanjsku i trgovinsku politiku, carine, saobraćaj i komunikacije Doma naroda PSBiH i Komisije za vanjske poslove Predstavničkog doma PSBiH

Sarajevo, 24.10.2016.

U okviru posjete predstavnika Bundestaga Savezne Republike Njemačke Parlamentarnoj skupštini BiH održan je sastanak predstavnika Komisije za vanjsku i trgovinsku politiku, carine, saobraćaj i komunikacije Doma naroda PSBiH i Komisije za vanjske poslove Predstavničkog doma PSBiH s predstavnicima Parlamentarne grupe prijateljstva za BiH.

Sastanku su u ime Komisije za vanjsku i trgovinsku politiku, carine, saobraćaj i komunikacije Doma naroda PSBiH prisustvovali zamjenici predsjedavajućeg Sead Kadić i Mario Karamatić, i Martin Raguž, član Komisije, te Željko Komšić i Senad Šepić, članovi Komisije za vanjske poslove Predstavničkog doma PSBiH.

U delegaciji Parlamentarne grupe prijateljstva Bundestaga za BiH činili su Marieluise Beck, predsjedavajuća Parlamentarne grupe, Josip Juratović, zamjenik predsjedavajuće, i Gerold Reichenbach, član Parlamentarne grupe. Delegaciju Bundestaga pratila je ambasadorica Savezne Republike Njemačke u BiH Nj.E. Christiane Hohmann.

U ime predstavnika obje komisije goste je pozdravio Mario Karamatić, zamjenik predsjedavajućeg Komisije za vanjsku i trgovinsku politiku, carine, saobraćaj i komunikacije DNPSBiH. U srdačnom i prijateljskom pozdravu istaknuto je dugogodišnje prijateljstvo i saradnja dvije zemlje, kao i veliku podršku Njemačke Bosni i Hercegovini.

Glavna tema razgovora bio je proces evropskih i euroatlantskih integracija Bosne i Hercegovine. Poslanici iz Bundestaga izrazili su zabrinutost trenutnim političkim ozračjem u zemlji, naglašavajući da se, po njihovom viđenju, u Bosni i Hercegovini ponovo podstiču teritorijalne i nacionalne podjele, što može biti prepreka u procesu pridruživanja zemlje Evropskoj uniji.

Savezna Republika Njemačka želi vidjeti Bosnu i Hercegovinu kao punopravnu članicu Evropske unije, naglasila je predsjedavajuća Parlamentarne grupe prijateljstva za BiH gđa Beck. Međutim, postoji zabrinutost da našoj zemlji ističe vrijeme za priključenje, s obzirom na to da u zemljama Evropske unije koje su suočene s terorističkim napadima i posljedicama migracijske krize raste broj euroskeptika i protivnika procesa proširenja.

Članovi komisija oba doma PSBiH istaknuli su važnost evropskog puta za Bosnu i Hercegovinu, koji nema alternativu. Naglasili su da građani naše zemlje žele vidjeti Bosnu i Hercegovinu u zajednici evropskih zemalja, međutim, cjelokupan integracijski proces predstavnici vlasti ne mogu iznijeti bez podrške i pomoći zemalja članica EU. Članovi komisija oba doma PSBiH zamolili su predstavnike Bundestaga da nastave s podrškom našoj zemlji, podrškom jednoj široj inicijativi koja će pokrenuti evropske procese u zemlji.

Protivljenje nekih država Evropske unije daljnjem procesu proširenja na zemlje Zapadnog Balkana, kao i uticaj Moskve i Turske, odnosno njihove politike na Zapadnom Balkanu mogu, bez evropskih i euroatlantskih integracija Bosne i Hercegovine, za posljedicu imati neizvjestan razvoj situacije na ovom području, te je ponovo naglašena potreba euroatlantskih integracija BiH.

Na sastanku je istaknuto da su predstavnici institucija BiH svjesni ograničenja koja je zemlji donio Dejtonski mirovni sporazum, i koja uveliko otežavaju evropski integracijski proces. Ističući da našoj zemlji treba jasan put ka Evropskoj uniji, s kredibilnim političkim snagama, članovi komisija oba doma PSBiH zamolili su predstavnike Parlamentarne grupe prijateljstva Bundestaga za BiH da nastave podržavati i lobirati za našu zemlju i njenu evropsku budućnost.

Zabilješku pripremila:

Kristina Milošević,
Stručna savjetnica u Komisiji za vanjsku i trgovinsku
politiku, carine, saobraćaj i komunikacije Doma naroda

Dostaviti:

- Komisiji za vanjsku i trgovinsku politiku, carine, saobraćaj i komunikacije Doma naroda
- Komisiji za vanjske poslove Predstavničkog doma
- Sektoru za međunarodne odnose i protokol
- a/a